

可以尊尊而廢親親亦與先儒之說正相反矣 聖上誠孝出天其所不足而當勉者豈在於恩乎范宣之荅蔣萬主意在於次孫當持重則與今日當行三年之說自不相干而謂之分明畫出今日事其他叔世之禮不足為後世之折衷者悉皆援引立證亦可見其論之駁而不精矣嗚呼在廷之臣孰不欲引君於無過之地而上自大臣下至韋布論議堂堂不謀同辭則此所謂人心之所同然而敢將一己之私見以戰已定之公議擅為別廟軒架等語略無辭讓慎重之意至謂滿朝名流舉陷無父之罪使三公不安舉朝失色不亦痛哉臣等俱以謏聞寡見其於禮學尤甚懵然而然於今日壓降之大義出於良知本然之天而得於萬口一辭之公論忝居論思之席得在可言之地竊想 聖明非必惑志於彼而猶令廟堂回啓者蓋欲令是非明白不厭熟講而大臣只說大約不欲深較臣等區區褊淺之見猶有所未安不敢嘿嘿伏願 聖明垂察焉 答曰知道爾等所陳亦未知盡是矣○己酉夜艮方東方有氣如火光○庚戌昧爽白雲一道如氣起自乾方直指坤方○合司啓曰茲引時親往山所一款再昨諫院劄論而 聖批懇惻一則曰至情難抑二則曰禮典所載臣等豈不欲仰體 聖教但考諸典故祭以事勢斷有不可行者則蓋人主一身為